



蔡氏九儒書 九



		九	漢書門
		八〇七	
	三	三	
一	六	冊	架

庫	文	閣	內
九	八	〇	七
函	三	冊	架

內閣文庫			
番號	漢	9807	
冊數	16 (16)		
函號	299	12	



蔡氏九儒書卷九

蔡權

淺草文庫

公字仲平號靜軒九峯先生季子聰明英毅兄弟師友子

姪範刑以兄恩補丞務郎亦嗜學授廬峯書院山長教

授鄉閭講明義理一日拜龜山先生祠士友請公正席

阜比因取龜山楊文靖公求仁齋記與諸生講明極其

詳密上下咸稱其得家學心傳者也著參同契論以斥

二氏衍三問說以自省戒視其著述雖不及周程邵張

之富至與學者講說使人心興起實不少讓焉學者稱

曰靜軒先生

生男公度

靜軒公像



讚

故家喬木世守詩書父師之訓不違如愚好吟詩賦博覽諸經賢人同歸習與性成

祝洙建陽人興化知府

靜軒公集

廬峯十七代裔孫 重重輯

目錄

皇極剛克要畧序

講明求仁齋記篇

講明為學之要篇

叅同契論

三問說

八陣圖說後解

詩

五言長篇一首
七言律五首

附錄

靜軒公墓誌

陳言善

靜軒公集

皇極剛克要畧序

權按戰陣之法始於黃帝與炎帝戰於阪泉擒蚩尤于涿鹿繼于姒啟之征有扈然五帝三王之迭興行軍以仁義自無敵于天下文武並用長久之術此皇極所以貴剛克也但後世之為將者知術數而不知仁義是徒欲以法制驅之而帝王仁義之師蔑如也然天下之數九而究矣九者數之體也八而極焉八者數之用也減一則為陣益一則為戰減者虛其中所以藏其用也益者取其對所以備其數也虛其中大將之所居取其對勝伏之所用損益之

法自然而然變通不窮神武莫測得失預定其機參錯異
習其智故我先君上自風后下接孫吳雜考百家傳記之
說著爲要畧使人知黃帝以來用兵以仁義如此其善孫
吳以降用兵以術數如彼其毒則時君世主知所好惡不
至于窮兵黷武玩殺看鬪以殘吾民之命其用心亦厚矣
觀古人箕張舒翼之布不一與今人自不相遠但其分合
出入奇正相生之變自在主兵者一時運用之妙亦非要
畧之所能傳耳蒙諸同志以權之不肖素知其說之詳俾
序諸首顧權不足與乎斯文但知仁義之爲美術數之說
君子所不道也願望總兵政者而能剛柔兼濟之勇仁義
並用庶或有廣於皇王體用之德云

講明求仁齋記篇

淳祐壬子春權到將樂拜龜山先生祠因與嫡孫楊道夫
等取先生求仁齋記講明之權曰古之學者求仁而已傳
曰放於利而行多怨又曰求仁而得仁又何怨銜鬻而不
售轉而易業者皆於利而怨者也吾以求仁名子之齋庶
乎求仁必得而無怨也古之人所以求仁者不亦難乎孔
門之徒問仁者多矣而夫子所以告之者豈一槩而言歟
有罕言以仁者以仁道至大而言之不盡也故凡所言者
皆求仁之方也若夫仁則未之嘗言其徒如由如賜雖曰

升堂之士至於仁終莫之許也所謂求之之難不其然歟
學者試以求仁思之以究古人求仁之方將必有以得之
矣龜山先生爲寶學省翁之祖所建書堂深嘉而樂道之
旣扁之以求仁又述其義以爲之記所以勉進後人求爲
學之意深且切矣然引而不發則仁道之大將安所用力
耶朱子以心之德愛之理言之又曰當理而無私心曰全
體不息詳此十六字而求仁之要在是學者於二先生受
罔極之恩詔之愈至豈求之之難果如先生所記云乎嘗
聞仁者心之理也是理根於人心用力於內者足以得之
心不外馳所存自熟則仁在其中孟子曰仁人心也放其
心而不知求哀哉學問之道無他求其放心而已文公言
說得來只是箇存心存心便是求仁所謂求仁者不放心
心而已又曰嘗存此便是求仁之方其靜坐未接物之時
此理湛然清明及其遇事應接時此理隨處發見只要人
常常提撕省察一息之間存養久之則是理愈明雖欲忘
之不可得矣釋仁遠乎哉章曰仁者心之德非在外也放
而不求故有以爲遠者反而求之卽此而在矣三復文公
之言則知求放心者乃求仁之要法也學者求放心其用
力之要當何如亦曰敬而已夫子告顏淵爲仁以克己復
禮爲仁禮者敬之輿也答仲弓問仁以見賓承祭爲言賓

祭者敬之推也至於居處恭執事敬無非以敬爲先敬則
主一無適自然操持收斂心存不放念念相續私欲屏息
而仁亦存敬則常惺惺自然體認涵養之功熟人欲淨盡
天理流行而仁亦熟敬之於心非有加也惟整齊嚴肅而
心卽在焉心之於仁非相離也亦惟心不外馳而仁卽在
焉張子曰敬非有內外賓主之辯敬在此而心卽在此也
非心之外別有所謂敬也朱子謂須更有間私欲萬端心
之所養者未熟欲之害仁者隨至非心之外別求所謂仁
也嗚呼仁之德愛之理當理而無私心全體而不息仁之
極功大矣未有不自此心之存養克擴者始也誠於中形
於外高明光大接續不已極而至於表裏內外遠近精粗
無不該貫心之妙用亦大矣未有不自此敬之提省收斂
整齊嚴肅者始也先賢言敬只是一箇心常惺惺便是豈
可指擎跽曲拳塊然在此而後爲敬仁只是此心常在腔
殼中爲主無私欲間斷則滿腔子皆惻隱之心是則心持
而敬自存心存而仁自熟求放心卽所以求仁持敬卽所
以求放心雖有次第淺深之不同要其歸則一也龜山先
生嘗問學者曰當孺子入井時其怵惕惻隱何故如此學
者曰自然如此先生曰安得說自然了便休須是求其所
自來而延平李先生每教人以靜坐默識體認天理求至

灑落處然後理與心一二先生之教深切著明日求其所
自來曰求至灑落處無非直指其脉絡以示人諸君子試
合二說而求之靜以省察而驗仁道之從生敬以涵養而
使仁德之自熟則求仁之方過半矣權過庭知省翁為考
亭及門之士讀求仁一記知省翁源委之所自因拜先生
里宅之祠登觀所記求仁之齋即所見而信所聞蒙諸同
志不鄙晚學賢令君以教化為尚屈臨見示顧權先公以
與朱文公相對榻論道被謫死遠方權安敢復強聒而為
饒舌者哉仰惟先生載道之南所以私淑邑里之學非一
而理精義微無過於求仁一記誦其書升其堂如見其人
且衣冠衿佩之士循循濟濟藹然忠厚氣象益信前哲流
風善教之猶存敢不誦所聞以相切磋富貴利達無足留
戀百事紛來與化俱往獨有義理一途與天地通諸君子
其亦加之意焉耳淳祐壬子冬大寒日

講明為學之要篇

權謂學問之道無他惟在於格致誠正修齊治平以造聖
賢之極致而已而其要惟在於求其放心而已誠能事事
審求其是決去其非積集之久心與理一自然發去無私
曲而聖人應萬事天地生萬物亦惟發去無私曲則放心
之收也自不難矣先師文公臨終語諸門弟子曰道理只

恁地但大家佐些堅苦工夫須牢固着脚方有進步處學者誠能堅苦佐工夫則勇猛精進到聖賢地位亦自不難諸友尙當拳拳服膺由孔孟之室而漸入之

參同契論

慶元丁巳春先公因與文公朱先生註釋六經語孟學庸之書而謫春陵正月初八日夜宿寒泉相與訂正參同契終夕不寐經今四十餘年或問於權曰汝祖季通與朱晦庵註參同契以黨異端乎抑爲佛老二氏養生益壽之資乎予曰生可養壽不可益或又曰生既可養壽不可益子之言何相悖也權曰生可衛養差無病壽之修短係於天孰能違天而益之不過以子時爲一陽之生當得調氣之法彼佛氏之明心見性似吾儒之盡心知性其修心煉性似吾儒之存心養性而實相去不啻千由旬特相與辯明以斥二氏之非豈註之以黨異端乎然則今之修煉者何如先公曰世之人雖知養生之理不悟修身之法則生亦不長雖知修煉之方不知養生之道則修亦無驗善養生者必先曲爲之防行不多言恐神散而損氣睡不張口恐氣泄而損神臨危登高則魂魄散蕩玩殺看鬪則氣結驚憂弔死問病則哀心流動臥濕當風則真氣泄弱古廟幽祠不可入入則神悸狂禽異獸不可戲戲則神恐對三光

濡溺折人年壽負四重深恩滅人大數飲宴於聖像側而
魂魄飛坐臥於塚墓間而精神耗枯木大樹之下不可息
防陰妖觸人陽神深水大湍之中不可馮恐寒威逼人直
氣奇花異卉莫拆防招妖恠入室非時果實勿食防帶邪
醴酒非會合不可頻飲飲之除人本祿負德忘義必招禍
輕人毀物天不祐世人若能慎於此壽夭由之而定是亦
修煉之一法或曰吾儒之事果若斯乎權曰吾儒則異於
是仁義存於已道德備於身孝親而敬兄忠君而愛民隆
師而親友不絕物而棄智不貪生而罔利使天地萬物各
其所是則吾儒格致誠正脩齊治平之學也豈佛老二
氏外物以爲智利而遺世者可同日而語哉或曰禁防誠
爲修煉之法敢問顏回大賢也得天地淳和之氣必能禁
防而修身奚短命而夭死柳展雄大盜也負凶暴狼戾之
資必不能禁防而修身何高壽而長存予前以子之言相
悖者正爲是也權曰昔日程子有云衰周和氣有限養得
仲尼已是多顏子之夭乃世之變而不可以常理論也修
爲者烏可視顏柳而遂懈其志哉君子惟其是而已其修
短一付之於天因作參同契論以解世人之疑云嘉熙己
未春上元日

三問說

權讀書於西山之陽緬想祖父遺蹟歲已暮而將至學未
 有聞德未加修恐懼斯道之湮晦寤寐先哲之流芳因作
 三問說以質同志焉曰冲漠溟滓謾無理乎一動一靜機
 孰為乎分陰分陽其無滯乎無形無兆曷塗轍乎有儀有
 象孰樞紐乎或為之先其大本乎或為之後其往復乎氣
 未之形極不先乎形之已著極安處乎動固非極靜為極
 乎用固非極體為極乎惟寂惟漠其無對乎惟動惟作各
 完具乎無極之極極果無乎有極之極極果有乎亭亭當
 當別一物乎層層疊疊惟無盡乎動靜無端曷無端乎陰

陽無始曷無始乎推之於前其有合乎引之於後其無離
 乎混而成復反于一乎闢而復通達于萬乎離器語道其
 虛無乎離道語器其上苴乎生生不窮孰不窮乎廣大不
 禦孰不禦乎人極之立命之性乎帝之降衷其有恒乎人
 之受中其有則乎大哉乾元資以始乎至哉坤元資以生
 乎合虛與氣有是名乎與道為體有是實乎仁義禮智根
 諸心乎剛柔善惡中而已乎萬物一原何通塞乎四端俱
 有何明暗乎高明中通稟於陽乎卑暗偏塞於陰乎理
 無不善奚有惡乎善固為性惡非性乎理附於氣能無偏
 乎氣原於理不可反乎論性論氣二之可乎曰惡曰混豈

其然乎生之謂性其作用乎生之爲性其氣質乎有形有
色其窒塞乎無善無惡非茫昧乎同出於理何相近乎各
受其成無相違乎成性存成之性乎所性不存性其天
乎五性之仁善之長乎心之全德本末貫乎偏言一事愛
之理乎義禮智信別有目乎怵惕惻隱迹其端乎性情之
端生之道乎禮樂之著生之序乎入孝出恭其爲本乎切
問近思仁在中乎爲之由已非存心乎求其放心非居敬
乎何事於仁一念差乎無時非仁終食違乎克已復禮乾
之道乎主敬行恕坤之道乎與物爲一特其量乎利澤及
人特其功乎仁固能覺覺卽仁乎仁固能愛愛卽仁乎推
已及物其恕矣乎以已及人其仁矣乎人欲淨盡天理完
乎天理流行仁體著乎內外合德其具舉乎終始如一其
不已乎博施濟衆必也聖乎肫肫浩浩達天德乎旣質以
言屏聽而息答曰子之所信乃所可疑予之所疑乃所可
信何必古初何必往聖反子身心厥有明證毫分縷析亦
得亦成三者理一一語事竟易不云平窮理盡性以至于
命噫學之可以明乎吉凶消長之理進退存亡之道故可
以無大過矣乎因作三問說以自警淳祐辛亥重陽善旦

八陣圖說後解

權按八陣之制始於黃帝氏得風后於海隅登以爲相得

力牧於大澤用以爲將風后作兵法十三篇孤虛十二卷
 立遁甲一千八十局而帝則有直木銳火方土圓金曲水
 謂之金木水火土之五陣太公則有天之星宿孤虛地之
 山川向背人之編伍彌縫謂天地人之三陣風后又有天
 地風雲龍虎鳥蛇之八陣孫臏則有方圓牝牡衝直方宜
 車輪鴈行之八陣吳起則有曲直銳封車箱車輕鵝鶴衝
 車之八陣李靖則有左虞侯右虞侯左一箱右一箱左二
 箱右二箱不謂之六花陣與又有大黑子大赤午青蛇卯
 白雲酉左突寅石擊申前衝巳後衝亥摧辰決勝戌破
 敵丑先鋒未不謂之十二陣與四面攻其地謂之靖入其

地謂之伐出其君謂之擅奪其地謂之削兵加其境謂之
 侵計治其罪謂之正誅其君謂之殘塞之使不得與隣國
 交通謂之杜絕其國謂之滅孔明又於魚腹浦壘風后之
 八陣以迷陸遜輔助先主佐佑邦家精神變化各盡其妙
 取用兵機微之理立兵乘二大法其法以八爲數八八六
 十四陣爲正兵三八二十四陣爲遊兵天衡十六陣居兩
 端地軸十二陣居中間天前衝四陣居右天後衝四陣居
 左地前衝六陣居前地後衝六陣居後風八陣附天雲八
 陣附地合而爲六十四陣也天衡併前後衝爲二十四陣
 合風八陣爲三十二陽也地軸併前後衝爲二十四陣合

雲八陣爲三十二陰也天衝四而地衝六者衝有餘而軸未足也遊兵二十四陣在正兵四十陣之先凡行軍之法結陣合戰設疑補闕全在遊兵天地之前衝爲虎翼風爲蛇蟠兵家先陰以右爲前又風從虎虎與蛇皆陰類同位西北也天地之後衝爲飛龍雲爲鳥翔兵家後陽以左爲後又雲從龍龍與鳥皆陽類同位東南也以天地風雲爲四正龍虎鳥蛇爲四奇此一圖八陣之制也每以二陣相從一陣之中又有兩陣一戰一守中外有輕重之權陰陽有剛柔之節彼此有虛實之地主客有先後之數非知兵者莫能究也傳曰秦之銳士不能當齊晉之節制武侯曰有制之兵無能之將不可以敗無制之兵有能之將不可以勝是知節制也者尤善用兵者之首務與今言陣者必曰八人豈不大謬與所以取勝者特詐謀奇計所謂三代仁義之兵若時雨者無復見焉耳嗟夫先王耀德不觀兵不得已而用者節制而已甘誓曰左不攻夫左汝不恭命右不攻乎右汝不恭命牧誓亦曰不愆于四步五步六步七步乃止齊焉不愆于四伐五伐六伐七伐乃止齊焉武侯此制如此妙矣渭濱之屯居民安堵實三代之法也先公季通著爲圖說以示人其所以言者此不復論謂非知兵機要者安能窺其蘊奧哉然於武畧則未必無小補云

寶祐甲寅仲夏長至日書

自詠

故居廬山東十載去不還故人廬峯北一念長周旋風波
既澗藐歲月空推延園地益新好亭館故依然憶昔紫陽
翁沉醉春風前登覽意有會攜提筆如椽銀鈎并鐵畫燦
爛疑蛇蜒至今雕梁上日夕生雲煙觸事多思遠撫景良
獨妍秀色可覽結嵐光澗無邊斯文與斯亭千古垂不刊

夜嘆

不寐中宵發嘆歌無聞見惡竟如何堪嗟歲月蹉跎久却
悔塵寰錯誤多事業分明早管晏源流直上接邱軻衰顏
皓髮雄心在蓄艾從今起宿疴

和鵝湖三先生韻

朱陸豪雄夙所欽本仁祖義渾同心高明頓足先登岸邃
密爲山漸到岑易簡支離爭誦切禪關俗學互浮沉撐眉
拏眼來蔥嶺公論昭明在古今

遊西山

洞天杳杳白雲低古木叢陰路欲迷晝永並無人跡混夜
深惟有鳥聲啼雨昏草色寒侵院風入松聲響亂溪隔宿
尋幽心未愜馬回山下日將西

夜坐

露冷風高天氣清中秋月色更分明捫懷永夜心同照抱
膝孤燈興自傾漏盡欣無塵客坐鍾鳴恍有老仙迎歸來
最愛天機靜莫遣紛紛混世情

掩扉

院靜秋深晝掩扉倦遊園圃坐忘歸休驚白髮催顏瘦且
看黃鸝遶樹飛翠竹受風生遠韻碧梧竟夕含清暉此間
標格誰能會唯有孤星入少微

附錄

靜軒公墓誌


陳元善 建安人

先生諱權字仲平九峯先生第三子也聰明英毅溫恭雅
飭孝弟忠信儀刑子孫肄業於家庭兄弟聯席自相師友
儼若洙泗伊洛之中見者驚異覺軒爲續近思錄易傳集
解大學衍說河洛探賾論孟集疏等書皆與先生參考以
至成編平生好施與凡宗族鄰里婚姻喪葬傾貲倒橐以
贈之殊無吝惜之意以兄恩補承務郎教授鄉閭講明義
理一日到將樂拜龜山先生祠士友楊道夫馮元正請先
生正席臯比因取龜山先生楊文靖公求仁齋記與諸生
講明極其詳密上下咸稱其得家學心傳者也作參同契
論以斥佛老二氏之非三問說有自警省戒飭之意講明
求仁齋記貫通乎孔門諸弟子問仁之法作圖說後解精

諸乎忠武侯八陣兵制之要視其著述雖不及周程邵張
之富至與學者講說辯疑祛惑使人心興起實不少讓焉
自講讀之外視富貴利達若將挽之者天性之高潔與祖
父無以異也獨處靜室幽軒終日怡怡學者稱之曰靜軒
先生子公度鄉貢守先生清白之訓先生生于慶元乙卯
十月二日戌時卒于寶祐五年九月二日辰時享年六十
有三是年十二月一日未時葬于崇洛里之鵬林娶吳氏
生于慶元戊午十一月十日申時卒于開慶元年七月二
十五日酉時是年十二月甲寅葬于崇泰里后山坵塲杭
橋舖後故謹書而刻之石以垂久遠云景定辛酉孟秋七

夕日書

天保丁酉



九卷畢



